

17. apr. 2015

**Siunnersuut uunga: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2015-imeersoq. (tuniniaanissamik nittarsaassisarnermut inatsit)**

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siumumit Inuussutissarsiornermut, suliffeqarnermut, Niuernermut Nunanullu allanut naalakkersuisut saqqummiussaanut ima oqaaseqassaagut

Inatsisissaq imaqarpoq; atuisartunut pisisartunullu siunnersuisoqatigiit, tuniniaasarneq, nalunaaqutsersuisarneq, akit aamma atuisartut pisisartullu maalaaruteqartarfittut ataatsimiitsitaliat pillugit Inatsisartut inatsisaata 13. november 1986-imeersup taartisaanik, tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisissaanik.

Siumumiit nuannaarutigaarput inatsit pisoqalisimasoq nutaamik taarserneqarniarman, aammalu ullutsinnut naleqqunnerusumik inatsimmik siunnersuuteqartoqarmat.

Inatsisissap siunertaanut Siumut isumaqataavoq, tassanimi neqeroorutitsialaat amerlanerpaanit paasineqarsinnaanissaat anguniarneqarmat. Aammattaaq pingaarluinnartutut isigaarput sullinneqartut/neqeroorfigineqartut pisinnaatitaaffimminnik ilisimatilluarneqarnerusinnaanerata pitsanngorsaaviginiarneqarnera, aammattaaq neqerooruteqarsinnaanermik akuersissutillit pisussaaffii ersarissarneqarmata.

Pingaartututaaq isigaarput Meeqqat illersorneqarnissaannik inatsisissaq imaqarmat. Ullutsinnimi takussaavallaalersimapput meeqqat nukangasut imeruersaatinik eqeersaatitalinnik atuisarnerat, tamannalu Siumumit peqqinnangittutut isigaarput.

Siumumiit inatsisissamut arlalinnik inassutissaqarpugut:

Siumumiit ilanngunneqaqqarput ussassaarisarnerit Kalaallit oqaasii atorlugit ingerlanneqartarnissaat tamatigut pisassasoq. Tassami Siumut isumaqarpoq kalaallit oqaasiisa eriagineqarnissaannut illersuisumik maannakkumut inatsisissatut siunnersuut killilersuisuusoq. Tassami namminersorneq pillugu inatsimmi ersarissumik allaqqaavoq kalaallit oqaasii tassaasut pisortatigoortumik oqaatsit. Taamaattumik Inassutigaarput inatsisissatut siunnersuut tassuunatigut sukateriffigineqartariaqartoq.

Aammattaaq Siumumiit inassutigerusupparput Inatsisissatut siunnersuutip ilaanni akiitsorluni pisisarnermi; Niuertarfiit aammalu niuffaffiit innuttaasunut imigassanik aammalu tupanik akiitsortitsisarnerata killilersimaarneqartariaqarneranik inatsisip sinaakkusiinissaa. Tassami atornerluinermi ilaatigut qaammammusiffimmi aningaasaatit niuerfimmuut tamarmik akiliutigineqartariaqartarsimanerat nalaattarsimavarput, taamaasilluni akiligassanut allanut kinguaattoornermik kinguneqarsinnaasarsimalluni.

Siumut isumaqarpoq atuisut siunnersuisooqatigiivi kommunenut nuunneqarnerminni sipaarutaassanngittut, taamannami qulakkeerneqarsinnaassasorivarput, maalaaruteqarsinnaanerup pitsaasumik ingerlaannarnissaa, innuttaasummi pisariaqartippaat maalaaruteqarfigisinnaasaminnik aammalu siunnersorneqarfigisinnaasaminnik attaveqarfissaqarnissaat.

Tamanna ilutigalugu apeqqutigerusupparput aalajangiisartussat qanoq inuttalersorneqarnissaasa naalakkersuisunit akissuteqarfigineqarsinnaanissaat.

Naggataatigut garantiip nunatsinni sivisussusaata nalilersoqqinneqarsinnaanerata ataatsimiitsitaliami eqqartorneqarnissaa kissaatigissavarput.

Taama oqaaseqarluta Inatsisartut inatsisissaattut siunnersuut Siumumiit Inuussutisarsiornermut Ataatsimiititaliamut aappassaaneerneqartinnani peqqissaartumik suliarineqarnissaa inassutigaarput.

Ineqi Kielsen

Siumut